



Siverth K. Heilmann

UKA 2022/126

Atassut

29. september 2022

Uunga siunnersuut: Inissianik attartortitsisarneq pillugu Inatsisartut peqqussutaata allanngortinnera pillugu Inatsisartut inatsisaat nr. xx. xxx 2022-meersoq

(Ineqarnermut Attaveqaasersuutinullu Naalakkersuisoq)

Inissianik attartortitsisarneq pillugu Inatsisartut peqqussutaata allanngortinneqarnerannut Naalakkersuisut saqqummiussaqaqarnerannut qujanaq, imatullu Atassummiit oqaaseqarfiggissavarput.

2013-imi Ineqarnermi Naalakkersuisuunerma nalaani, inatsisartunut innuttaasunullu oqaasinnaarinikuuvara, sanaartornermi tamatiguunngikkaluartoq sannarlutarpassuit oquullu atugaaleraluttuinnarnera aamma sanaartukkat nutaarujussuugaluartut akornanni.

Aap Namminersorlutik Oqartussat kommunillu nalinginnaasumik inissianik pilersuinerini inissiat attartortittakkat aqqissuussisimanerlu maalaaruteqartarfiullu piginnaatitaaffiusut nalilersorneqaqqittariaqarneri, tunngaviatigut Atassummiit isumaqatiginaqaaq.

Nammineq qinikkatut ilisimavara, Namminersorlutik Oqartussat kommunillumi inissiaataani illoqarfinni nunaqarfinniluunniit ineqartut ikinngeqisut naammaginngisaqarlutik saaffiginnittartut, ajoraluartumillu aamma amerlaqisunut saaffiginnissutit tusaaneqartuaannaratik.

Ulluni qaninnerni nunarput annertoorujussuarmik silapilummik sialussuaqattaarneranillu nalaanneqarpugut. Inissiani nutaarujussuarni igalaat killinginiinnaanngitsoq erngup isaasimanerannik kiisalu pisoqqani qanittumili iluarsaallugit naammassineqarnerartuni, sialuk pingaartumik igalaat killingatigut isaasimanera oqariartuutigineqattaarpoq.

Inuit qinigaattut inatsisiliortutullu inatsisit peqqussutilluunniit allanngunngisaannartussatut aalajangersaaneq ajorpugut, taamatullu aamma Naalakkersuisut paasinnillutik inatsisartunut nalilersuerusunnerat Atassummiit ilassilluarparput isumaqatigalugulu.

Taamatut naatsumik oqaaseqarluta, suliaq aappassaaneerreqartigani, ataatsimiititaliami susassaqtumi tusarniummi uparuaatigineqartut ilanngullugit nalilersorluarneqarnissaat Atassummiit kaammattuutigissavarput. Ataatsimiititaliaq sulilluarnissaanik kissaapparput.

Qujanaq.